



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir_yimyim

tir yimyim TAPAK 8

South Korea taoba tir takum
tepiyong tepuokdak ayutsü

Harmanpreet Kaur-i
otsü tasen yangluogo



VOL. XXIII ISSUE NO. 128 (ADOK 128) DIMAPUR ROGONÜ (FRIDAY) TSÜKLAI (FEBRUARY) 20, 2026 ₹ 5.00

ANATG 2015 batch maneni longkak aiter

Dimapur, Tsük;ai/February 19 (TYO): Sorkari telangzüba tajung ka magütsü tashi mener longkak aittsü, ta All Nagaland Ad hoc Teachers' Group (ANATG) 2015 batch ajanga Brehostibarnü ashi.

Longkak aitba anogo 12 ajungba mapang iba telok yagi Brehostibarnü Principal Director ajanga Commissioner and Secretary nem shiti ka agütsüba nung service regularisation atema documents agüja aliba indang tejangja meshia liasü.

ANATG indang core committee züngsem Thungchanbemo Ezung-i ashiba agi, sorkari meshiba

documents samar aliba dak sendakba ken o ajungba mebantetteter.

Documents meshiba karbo department-ia magütsüteter, kong records tem ayur, ta pai ashi.

Department ketdangsurtem ANSTA aser High Power Committee agreement nung meyongnem agütsürtem den senden ka Brehostibarnü mentar aser menuaka telemtetba tajung angutsü imlar, ta paisa ashi.

Sorkari telangzüba tajung ka magütsü tashi maneni longkak aittsü aser züngsem temi telemtetba agira tesashiba akumtsü, ta parnoki ashir.

Kohima Municipal Council nung lenir tasen nungdaker

Dimapur, Tsüklai/February 19 (TYO): Kohima Municipal Council (KMC) indang chairperson aser deputy chairperson temang manemba agi mapa nungi anenogo, ta Deputy Commissioner, Kohima, B Henok Buchem-i Brehostibarnü jangjatsüogo.

Pa indang office chamber nung osangbener tem den jembidang, chairperson mapa nungi anenba shiti ya January 17 nü angu aser deputy chairperson indang shiti ya February 10 nü angu, ta pai ashi.

Ward 18 (Paramedical Colony) nungi Neikhozo Suokhrie aser Ward 17 (Agri, Electrical aser Forest) nungi Khrielievi Chusi - tenaprong Nationalist Democratic Progressive Party (tangbo Naga People's Front) nungi councillors liasü aser tena ya chairperson aser deputy chairperson inyaka liasü.

Nagaland Municipal Act nung shia aliba ama January 27 nü deputy chairperson nem anogo 15 notice agütsü aser ken o ya February 11 nü Department of Municipal Affairs dangi final orders atema yoker ata lir, ta Buchem-i metetdaksü.

Chairperson atema anogo 15 notice ya February 12 nü agütsü aser mapang tembangba sülen district administration-i iba ken o department dangi yoktsü, ta ashi.

Chairperson aser deputy chairperson nati mapa yutsüba

kuli ya temang majungba ajanga lir ta shia lir, ta DC Kohima ajanga metetdaksü.

Department of Municipal Affairs ajanga posts tazung aliba sangdongba sülen councillors temi chairperson aser deputy chairperson tasen shimtsü.

NFHRCC-i CM dang Nagaland Foothills Road asoshi tayongzükba agütsür

Dimapur, Tsüklai/February 19 (TYO): Nagaland Chief Minister Dr. Neiphiu Rio-i Nagaland Foothills Road project yariba atema kanga pelaba lemsateper, koba 2013 küm tenzükba sülen Nagaland People's road ta ajar, aser iba lenmang yagi Mon District nung Tizit nungi Peren District nung Khelma sendakteper, koba kilometer 395.9 talang aser district ti aser yimsüing 200 dak tema ajanga süiyir, ta Nagaland Foothills Road Coordination Committee (NFHRCC) ajanga ashi.

Pa teyari nung SASIC loan Scheme küok 2 Lane foothills Road project phase mezüngbuba terenemer, anungji Committee-i ano maneni pa dang meyi metenzükdang 2 Lane Foothills Road construction nung tanüngba Divisions nung phase tanabuba atema Work Orders tekeraba nung agütsütsü ajungshir, ta ashi.

Minister, PWD, Road & Bridge, Kaito Aye-i February 7, 2026 nü Baghty Division, Wokha District nung tang lenmang teyangludak aliba tsüingdong oa semdanga March 31, 2026 tashinung mapa renema inyaktüsü

anogo züngzüktsüba asoshia pelar, ta ashi.

Aser contractor firms M/S JK Constructions, M/S Chabou & Co aser department technical supervisory team temi Minister-i ashiba ama anogo matsülangi mapa tembanga inyaktüsü imlar, ta NFHRCC ajanga ashi.

Committee-i ano maneni MLA,40 Bhandari A/C, Secretary General NPF, Chairman, Bhandari SDPDB aser Chairman, Committee on Environment & Climate Change, Govt. of Nagaland, Achumbemo Kikon dang pai tezüluba nung M/S JK Constructions aser M/S Chabou & Co dak nükla tajung aliba nung ajemdaker shim ta ashiba ama pa indang constituency kübok Baghty Division nung iba mapa inyakba repringshimtsü ajungshir, kechiaser firms ana yagi sorkari mapang shidak nung senotsü magütsüra parnoki senotsü indoka atatsü ta nangzükba lir, ta ashi.

Anungji committee-i local MLA dang pai nangzükba ama mapa inyakba tesem tsüingdong oa semdanga mapa shidak inyaker asü masü ta repringtsü ajungshir, ta ashi.

Committee-i sendaktepa aliba department dang Baghty Division nung apu pezü yangluba firms aser Peren Division nung contractor firm ka nem tekeraba nung Galvanized Steel Structures agütsütsü ayongzükter, aser ano mapang shidak nung mapa tembanga inyaktettsüba nungdakba senotsü tekeraba nung agütsütsü ajungshir.

Niuland, Tuli, Longleng aser Naganimora Divisions nung lemzüktsüba mapa temlung süa rinyakba atema contractor firms tem dang pelaba lemsateper. Tizit Division upgradation mapa renemtsü asoshi March 31, 2026 tashi mapang apulokja aliba ama inyaktüsü imlar, ta ashi.

Kanga yongya ataba Nagaland Peoples' road tekeraba nung renemtsü mechi Ao Senden, Lotha HOHO aser Lotha Lower Range Students' Union (LLRSU), Aggrieved Foothills Road Forum-Bhandari & Changpang Area (AFRF-B&CA), Northern Sumi Community, Dimapur aser Sangtam Union Dimapur ajanga Nagaland sorkar den par tejangraba lemsatepba asoshia pelashishia agizükter, ta NFHRCC ajangasa ashi.

Nagaland Youth Congress küm ter sülen elections agitsü



Kohima, Tsüklai/February 19 (TYO): Brehostibarnü Nagaland Pradesh Youth Congress (NPYC) pur membership drive tenzükogogo aser küm ter jungnüa lir tang mezüngbuba organizational election agitsü sangdongogogo.

Congress Bhavan, Kohima nung sentong ka agidang, Nagaland nung Youth Congress internal elections magi küm ter jungnüa arur, ta NPYC tir Lima Lemtur-i ashi.

Indian Youth Congress (IYC) nungi totuyuba agütsüba ama Youth Congress indang Election Commission dang state nung election maparen tenzüktsü tuyu, ta pai ashi.

"IYC-i onok dang Nagaland

nung elections agitsü ashi. Anungji tanü nungi membership drive tenzükter," ta Lemtur-i ashi aser iba inyakyim yagi state nung lanur tentet tashi taitba aser democratic yimya nung asendenshitsü ta shisem.

Sentong nung jembidang, Nagaland Pradesh Congress Committee (NPCC) tir aser Lok Sabha MP, S Supongmeren Jamir-ia iba enrollment drive ya grassroots nung Congress party tashi itshitsü asoshi maongka lir ta ashi.

Yimtiba nung kisüing masü saka districts ajungba nung Youth Congress tashi shidakba jangjatsü asoshi enrollment shidak agitsüla, ta pai ashi.

"Enrollment ya senti vote ka-ka bendenba lir. District tem nung züngsem peria mali tashi asenoki asen tashi masadantettsü," ta Jamir-i ashi.

Pai ketdangpurtem dang parnok mapa nung nendaka inyaktüsü aser temsüa aliba lanurtem iba organization nung anioxtsü ayongzükba liasü.

Tang yimtenren tensa ajanga elections agitsüsa masütsü akok, saka IYC ajanga tuyuba ama enrollment mapa inyaktüsüla aser iba sülen elections agitsü, ta ashi.

IYC general secretary in-charge of Nagaland, Thar Johnny-i ashiba agi, Congress nung dena democratic process aser linük yangerba nung shilem agitsü asoshi youth wing-i temsüa aliba lanur ajungba asoshi kishi lapoker.

"Arishi küm 18 aser 35 tsüingta lanur temi tenung zülüoktetsü aser Nagaland nung Youth Congress indang district mesüra assembly lenir akumtsü atema nominations agütsütettsü," ta pai ashi aser lanurtem dang marendaki arua organization nung lenir mapa inyaktüsü ayongzükba liasü.

Pradesh Returning Officer

Farnindra Kumar Singh-i iba election inyakyim yagi Rahul Gandhi indang mangdang sayur aser Youth Congress ya ochishia democratic yimya nung inyaksangshir ta ashi.

Nomination fee ya February 25, 2026 nungi March 7, 2026 tashi agizüktsü aser membership aser voting period ya March 16, 2026 nungi April 16, 2026 tashi alitsü, ta Singh-i metetdaksü. Membership fee ya züngsem shia sen 75 alitsü.

Election ya digital sapang ka ajanga agitsü aser applicants temi Google Play Store nungi "With IYC" mobile application download asütsüla, aser register sür live photograph ka, second ti live video aser Voter ID card agütsütsüla, ta pai ashi.

Nomination mapang arishi küm jangjatsü atema Class 10 certificate, passport mesüra driving license agütsütsüla.

Iba dak sendakba nung osang tejangja IYC election website nung angutsü, ta ketdangsur temi metetdaksü.

Iba anogo NPCC tir S Supongmeren Jamir aser party lenirtemi membership drive tenzükja liasü.

WENN-i ayongzüka fashion design training agütsü

Chumoukedima, Tsüklai/February 19 (TYO): Women Entrepreneurs Network Nagaland (WENN)-i ayongzüka Basic Fashion Design dak sendakba nung hopta trok atema Entrepreneurship Skill Development Programme (ESDP) ka CENTY J, 5th Mile, Chumoukedima nung ayongzüka agiogo.

MSME Dimapur-i teyari agüja tetsür 28 nem iba training mapang design principles, fashion illustration, pattern making, garment construction,

asere entrepreneurship dak sendakba nung tangazükba agütsüogo aser shishilembatsü atema parnok renemtsüogo

Kasa mapang nung District Industries Centre (DIC), Khadi and Village Industries Commission (KVIC), aser banking institution tem nungi shisalen sayurtemi financial literacy aser entrepreneur tem atema sorkar scheme tem indang tangazükba agüja liasü.

Maneni Local entrepreneur temia parnok inyakya aruba lemsatop aser sentong nung shilem agirtem ajungshia liasü.

Training shibangba sentong nung tetsür entrepreneur aser MSME nungi representative temi shilem agi, shirnoki training nung shilem agirtem parnok sangrasangji aser bendanga agüja shilem agiba atema tenüngsang agüja laisü.

Iba inyakyim benoka inyakba ajanga Nagaland nung fashion ecosystem renlokyonga oya aliba mapang tetsürtemi aniba enterprise tem atema lenmang lapoktsütsü aser shishilembatsü atema renema toktsütsü asoshi parnok bendanga agütsür aliba sayur.

Union Minister Ram Nath Thakur-i ICAR-KVK, Longleng semdang

Dimapur, Tsüklai/February 19 (TYO): Union Minister of State for Agriculture and Farmers Welfare, Ram Nath Thakur-i February 19 nü ICAR-KVK, Longleng semdanga district nung aluyimertem libaliro jenjang ajungkettsü nükjidong nung benokba agricultural development sentongtem lepareprangshia liasü.

Sr. Scientists, extension personnel aser aluyimertem den sensaksemba mapang Minister-i, tekong lu ayimba ya scientifically validated, location-specific technology tem amshia modernize sütsütsü nungdakba lemsatopa liasü.

Paisa, tekong lu ayimba yimya ya tetsütebou nungi belenzüka aluba shisatsütem mesamadaktsüi lia liabo tashi kanga mintokba, resource-efficient aser tsü mopung den apetba aluyimba yimya ka kuma yoktsüla ta ashi.

Minister-i, tenem lima nung apetba low-input responsive

crop varieties tem sayuba asadanga liasü. Paisa, Jal kund aser small-scale rainwater storage system tem densema tzü bendena ayutsü asoshi ajungmesotsü atema inyakba asoshi tenüngsang agütsü, koba Longleng nung tzünglu agi anüngba tebilemstü bentettsü asoshi kanga tongtibang lir.

Kasa mapang nung pai, processing, seed production, aser allied Agri-enterprises ajanga tetsür aluyimertem yongtsü nung entrepreneurship renloka odaktsütsü ajungshi.

Minister-isa, aluyimertem temeden kumzüka ayutsü, tetsü tebou mapang nungi amshia aruba metsüjangnatsütem wazüka ayutsü aser tajangzüktem lemsa agitsü atema inyakyim shidak benoktsü nungdakba lemsatopa liasü.

Aluyimertem den sensaksemba mapang pai, aluyimertem nem teyari agütsütsü atema sorkar bendanga agütsür aliba nenshia metetdaktsü.

Iba tesem semdangba ya KVK experimental aser demonstration unit tem sema senzüba sülen tembanga liasü. District nung sustainable agriculture aser yimtsüngtem nung libaliro jenjang ajungkettsütsü atema ICAR-KVK Longleng-i tongtibang shilem agiba ngua temulung asüba pai lemsatopa liasü.

Maneni Minister-isa, district Hq. Longleng nung Bautung Government Higher Secondary School nung NECTAR Project aser District Hospital Longleng densema terenlok maparen balala semdang, kong pai district hospital Longleng nung mapa agi temulung asüba lemsatopa liasü.

Union Minister ya MLA Longleng, A. Pongshi Phom, Deputy Commissioner Longleng, W. Manpai Phom NCS, department balala nungi ketdangsürtem lokti tentet balala nungi lenirtemi meiner oa liasü.

Yakor yimtsüng nung documentation sentong ka agi



Yakor nung February 18 nü "The Living Morung and Traditional Knowledge" dak sendakba nung documentation sentong ka agiba mapang ketdangsürtem aser cultural troupe tem tangokba noksa nung angur.

Kohima, Tsüklai/February 19 (TYO): Department of Art & Culture, Government of Nagaland-i ayongzüka "The Living Morung and Traditional Knowledge" omen dak ajemdaker Shamator kübok Yakor yimtsüng nung February 18 nü documentation sentong ka ayongzüka agiogo.

Iba sentong nung shilem ka ama "Traditional Craft & Weaving" workshop-a ka agia liasü.

Sentong ya Yakor yimtsüng Head G.B J. Kiumukam-i maotsü, kong yimtsüng council chairman aser tanga lokti tentet

balalai shilem agia liasü.

Iba sentong ya Assistant Curator Kiumukam lenisüba nung agi aser Deputy Director, Department of Art & Culture, Nagaland Teisovikuolie Therie-i lokti pela agizükba o jembia liasü.

Sentong nung shisalen sayurji L. Tohanba, S. Yanhola, S. Hanji, S. Perimong, T. Rethsong aser Z. Toshila nung liasü.

T. Yurahamong-i arju ya koda tongtibang iba indang lemsatop aser Shokheamong-i Yakor yimtsüng puti otsü lemsatopa liasü.

Sentong nung Throngtsa Cultural Society aser Sangpung Cultural Society nati sobaliba saya balala sayua liasü.

Sentong nungsa lanurtem aser Yakor yimtsüng nung yimtsü yimbotem sensaksem sentong ka agia liasü.

Maneni Teisovikuolie Therie-i appreciation certificate tem lemsü aser Kiumukam-i tepela o jembia liasü.

Sentong kanga takok ngua agiogo aser iba ajanga sobaliba shisatsü aser senmang wazüka ayutsü asoshi tangazükba tali agütsüogo.

Army Recruitment atema tenüng züngoksem tenzüko

Dimapur, Tsüklai/February 19 (TYO): Indian Army-i sangdong ka ajanga Army Recruitment (Agniveer) 2027 atema online ajanga tenüng züngoksemtsü asoshi 2026 kum February 13 nungi Arpil 1 nü tashi mapang lapoktsüba metetdaktsüogo.

Tejangrartem dang atakzükja aliba mapang tsüngda official website ajanga apply asütsü kasa sangdong ajangsa metetdaktsüogo.

Online entrance tatidang 2026 kum June 1 nungi 15 tashi agitsü. Recruitment drive ya Agniveer tradesman aser tanga notified trades kübok category balala atema candidate tem asoshi lapoktsüogo.

Iba recruitment cycle atema arishi kum 22 tashi apply sütettsü asoshi ajungkettsüogo, anungji candidate tem ya 2005 kum July 1 nungi 2009 kum July 1 tsüngda asortem asütsüla. Temsüa aliba candidate temi category balala atema apply sütettsü, saka parnok criteria agüja aliba küboki aittsüla.

NCC certificates, ITI

mesüra diploma qualifications aser taoba kum ana tsüngda saisabong nung jenjang balala nung takok tajung ngur alirtem guidelines nung aliba ama tangar dang nungi balaka asadangtsü. Service personnel, ex-servicemen, aser war widow tem indang ward ananai (adopt asüba jala jabaso) tang benoka aliba inyakyim dak ajemdaker bonus mark agitettsü.

Educational qualifications aser medical tatidang atema yanglushir aliba term tem ya official temzüng ozüng dak ajemdaker benoktsü. Recruitment atema registration taah sen 250 dang asütsü.

Online application dak sendakba nung osang tejangjaba agitsü atema candidate tem dang official website : www.joinindianarmy.nic.in semdangtsü metetdaktsüogo.

Ken o jangjanüra candidate temi helpline number 7628023484 mesüra email arorangapahar77@gmail.com ajanga Army Recruitment Office den tongteprateptettsü.

Gidemi nung school ki tasen semzüko



Gidemi nung February 19 nü school ki tasen semzüko mapang ketdangsürtem aser tangartem tangokba noksa nung angur.

Kohima, Tsüklai/February 19 (TYO): Phek district nung Government Middle School Gidemi indang school ki tasenba February 19 nü Dr. Kevizakie Rio, Joint Mission Director, Samagra Shiksha, Nagaland-i semzüktüogo.

Sentong nung o jembiba mapang Dr. Rio-i, yimtsüng nung aliba tanurtem nem jenjang aketba kakat shisatsü agütsütsü tejangraba aliba sayuba atema Gidemi nung alirtem nem tenüngsang agütsü.

Lokti tashi chichibaji kakat shisatsü bushitsü atema lokti bendanga agütsür aliba dak metaloka lir ta shia pai, yimtsü nung alirtem dang department of school education kübok school nung kakatshirtem züngoksema aliba dak ajemdaker school category balala inyakyim indang lemsatopa liasü.

Paisa, shisaluyim ya terenlok asoshi tongtoret lir aser iba ajanga lenla ajak nung terenlok bener arutsür, ta ashi.

Paisa, yimdaklirtem dang shisaluyim ya kanga junga azüitstü ajungshi aser shisaluyim ajanga asen

nüburtem tangar memenepi aliba nungi terenlok dangi aniba indang lemsatopa liasü.

Rio-i, yimtsüng lenirtemi tesayur tali nungdakba, yimtsüng kanga kinük nung aliba ajanga class 6 nungi 8 tashi nung kakatshirtem züngoksemtsü aser school infrastructure akangshitsü nungdakba indang tebilemstü lemsatopba ya takok tashi bentettsütsü tenangzükba agüja liasü.

Sentong nungsa SMC GMS Gidemi mendenbuba Niezo D Vadeo-i, kakatshirtem yimtsüng anasa aliba jilatemi kakatshisatsü bushitsü atema yoktsü asoshi tsürapurtem timtemtepba lemsatopa liasü.

Maneni sentong nung Gidemi Village Council chairman Nuzota Tetseo-i lokti pela agizükba o jembia aser VDB Secretary Vekhoyi Lohe-i tepela o jembia liasü.

Dr. Kevizakie Rio ya Keshukietuo Dzuwichu, PRO to Advisor School Education & SCERT aser Kelhikha Kenye, Deputy Mission Director, Samagra Shiksha Nagaland nati meiner oa liasü.

May 5 nungi Supreme Court-i CAA anema benokba ken otem angadangsü



New Delhi, February 19 (Agencies): Brihostibarnü Supreme Court-i, Citizenship (Amendment) Act, 2019 (CAA) anema benoka aliba ken otem May 5 anogo nungi tenzuka angadangsü, ta metetdaksü.

CAA anema temepishiba ken o 200 dak tali benoka lir.

CAA ozüing kübok, Pakistan, Bangladesh aser Afghanistan

linüktem nung reshikangshi marem 2014 kum December 31 anogo tashi nung India-i arua jenoka aliba Hindu, Sikh, Buddhist, Khristan, Jain aser Parsi nungertem nem senso agütsür.

Chief Justice Surya Kant den Justices- Joymalaya Bagchi aser Vipul M Pancholi nungeri akumba bench-i item ken o tatembangsüa angadangsü

atema inyaksangshi tenzükogo. Bench-i, Indian Union of Muslim League (IUML)-i benokba ken o densema CAA anema benokba ken otem parnoki angadangsü aser ken o jembitsü atema Centre sorkar nem anogo ka agütsütsü, ta metetdaksü.

CJI-i, bench-i ken o angadangbaji May 12 nü tembangsü, ta metetdaksü.

Bench-isa telok balala dang, taruba hopta pezü tsüingda nüngdakba documents aser ken otem agüjang, ta tuyuogo.

Bench-i, parnoki mezüing linük tesem ajaklen CAA benokba angadangsü, iba sülen Assam aser Tripura na dak sendakba CAA ken otem angadangsü, ta metetdaksü.

UP nung ninang telok kati nisung ka metakset aser 20 yiru

Lucknow, February 19 (Agencies): Uttar Pradesh kübok Unnao district nung cricket tasayadak mapang nung ninang telok ka arua amakba sülen arrshi kum 65 umpire, Manik Gupta asü aser asayar 20 yiru, ta Brihostibarnü police-i metetdaksü.

Bodhbar nikongdang Unnao district kübok Sapru Maidan nung Kanpur Cricket Association-i ayongzükba asaya mapang nung iba lendong ya atalok.

Cricket tasayadak mapang

nung ajungbena ninang telok ka asayaba moapu jagi aruba sülen umpire densema asayartem dak metak.

Tenük kuli alirtemi ashiba agi, ninang aikati metakba ajanga Gupta lao aser süchia aoba sülen Kanpur nung aliba Lala Lajpat Rai Hospital-i anir ao, saka meküzmük.

Kanpur Cricket Association Tir, S N Singh-i, "Gupta ji ilonga hospital-i anir ao, iba mapang nungjia pa tejak aser temang sünga ninang liasü," ta ashi.



February 19, 2026 nü Maharashtra kübok Nanded nung aliba exam centre ka nung Shital Chandrakant Chitte-i lai asoba kinü tanur ka ajunger Class 12 Maharashtra board exam agütsüdang tangokba noksa nung angur.

India-i Bangladesh nung visa services ajak tanaben tenzüksü

New Delhi, Tsüklai/February 19 (Agencies): Brihostibarnü Bangladesh nung Indian Consular Missions nung tongti ketdangser kati, kobi melii India-i Bangladesh nung visa service ajak asentenshir tenzüksü, ta metetdaksü.

Sylhet nung India senior consular official, Aniruddha Das-i, Bangladesh den visa service ajak tenzüksü atema maparen inyakdar, ta metetdaksü.

Bangladesh nung osangbenertem den jembidang Das-i, "Medical aser double-entry visa bo agütsü tenzükogo, aser travel visa densema tanga visa-a ajak tenzüksü atema inyaksangshidar," ta metetdaksü.

2024 kum July-August nung Bangladesh nung nüburtemi longkak aita Ato kilonser Sheikh Hasina-i aniba Awami League sorkar atsüingdokba sülen India aser Bangladesh na tsüingda tesendaktep kanga mejungi aküm.

2009 kum Hasina Ato kilonser akumba mapang nungi

India aser Bangladesh na tsüingda tesendaktep kanga junga aküm.

Ajisüaka Muhammad Yunus-i aniba interim sorkar mapang nung linük ana tsüingda tesendaktep kanga mejungi aküm. Pa yimsüsüba mapang nung Bangladesh nung Hindu nunger densema minorities anema inyakba tatalokba aika liasü.

Bangladesh nung aliba Indian Mission-a amokmeren tensa ka nung aliba ajanga India-i 2025 kum December 17 nungi tenzuka Bangladesh nung visa services ajak anena liasü aser Bangladesh yimtiba, Dhaka nung Indian Visa Application Centre shibang.

Tawa election nung Bangladesh Nationalist Party (BNP)-i takok tulu ngua party tongti, Tarique Rahman-i Ato kilonser tenangzükba agiogo, anungji asentenshir linük ana tsüingda tesendaktep yanglushitsü atema linük anapronglai inyaksü.

Aniruddha Das-i, "Teti atema tesendaktep yanglushitsü

atema linük anaprongla nungi sensotemi tongtibang shilem agitsü," ta metetdaksü.

Bangladesh nung India-i 2024 kum August 8 nü mezüing visa service khenpiga atema anena liasü. Hasina-i aniba sorkar atsüingdokba sülenbo Bangladesh nung tensa mejungi akumba nung ajemdaker India-i Bangladesh nung aliba Indian Visa Application Centers (IVACs) ajak shibanga liasü.

Iba sülen medical aser double-entry visas bo tenzuka liasü. Yamaji lia yaküm November ita nung Bangladesh nung Osman Hadi tepsetba sülen India anema longkak sashia aitba mapang India-i ano Visa Application Centres shibang. November 17 nü Dhaka IVAC tama shibang, iba sülen November 22 tashi nungbo Chittagong, Khulna, aser Rajshahi nung aliba IVACs-a shibanga liasü.

Ano külen Bangladesh-ia New Delhi, Kolkata aser Agartala densema tesem aika nung parnok indang Consular missions shibanga liasü.

Rahul Gandhi den Congress MP 25 khasettsü amokmerener ka apu

New Delhi, February 19 (Agencies): Brihostibarnü Rajasthan kübok Kota nung police-i Rahul Gandhi den opposition MP 25 khasettsü amokmerensang puogo.

Right wing telok Karni Sena nung otongdar, Raj Singh-i video ka ajanga, tawa Parliament nung Congress MP 25-i Lok Sabha Speaker, Om Birla mezüingmeshia jembiba ajanga BJP aser Karni Sena nung inyakertem ajak jashidaksüogo, ta metetdaksü.

Raj Singh-i, "Iba ama ya tanaben atalokra onoki item MP tem kidangi oa ki bendoktsütsü. Iba ya Rahul Gandhi tetuyuba nung inyak asütsüa akok, ta ni amanger. Rahul Gandhi- nai iba ya tenoktenoka angaoka ayutsüla, iba ama ya tanaben atalokra onoki ner ki telungi aita na khasettsü," ta metetdaksü.

"Item MP tem ghonda 24 tsüingda pura junger. Mesüra onoki parnok ajak ka khen, ka khen ta khasettsü," ta pai metetdaksü.

Iba video ji social media nung prokshiba sülen Kota police-i pa puogo. Kota Superintendent of Police (SP) Tejaswani Gautami, police-i pa pua Borkheda police station nung pa dang asüingdangyadar, ta metetdaksü.

Paisa, "Tang tashi nungbo pa organisation kar den sendaktepa aliba mejangja. Ajisüaka pa anema Udyog

Nagar police station nung ken o pezü benokogo. Arrla tapet nung ajemdaker pa anema ken o akatsü," ta metetdaksü.

Iba video nungji Ato kilonser Narendra Modi aser Om Birla na salemba noksa ka Singh sülen jara nung meyanga lir.

BJP Kota Tir, Rakesh Jain-i, "Video nung aliba nisungbaji BJP den tesendaktep kecha mali. BJP ya linük yangertsü atema inyakba party ka lir. Iba ama tashishitsü o jembibaji onok tangatetba nung mali," ta metetdaksü.

Ano külen Karni Sena national Tir, Mahipal Singh Makrana-ia, video nung aliba nisungbaji Karni Sena den sendaktepa mali, ta metetdaksü.

Paisa, Karni Sena-i kodanga nisung kar taküm agitsü sangdong agüja mali, ta metetdaksü.

"Onoki longkak aiter, wako tanak sayur aser lenmang nung longkak aiter, saka onoki kodanga nisung kar tepsettsü atema mejembir aser majungshir. Ibaji onok tangatetba nung mali," ta Makrana-i metetdaksü.

"Onok atemabo, Narendra Modi akhümtsüsuba ama Rahul Gandhi-a akhümtsübur. Onok tangatetba balala asütsüa akok saka onoki shinga amokmeren masür. Iba nisungba ya Karni Sena züingsem ka masü," ta metetdaksü.



February 19, 2026 nü Chennai nung Tamil Nadu Chief Minister MK Stalin, state Deputy Chief Minister Udhayanidhi Stalin, DMK MP Kanimozhi Karunanidhi, DMDK General Secretary Premalatha Vijayakanth aser tangartem senden amenba sülen tangokba noksa nung angur. Tamil Nadu assembly election nung DMDK-i DMK-i aniba teloktep nung denner tokteptsü.



TIR YIMYIM YIMOBILEM (EDITORIAL)

DIMAPUR

ROGONÜ

TSÜKLAI 20, 2026

Tashi mangaba ketdangsertem !

Kidang tanurtemi tashi mangabaji majung saka tim dang, kaketreju nunga kaketshirtemi tashi mangabaji majung saka ajia yimya dang aser lokti nunga nütsüng nübortemi tashi mangabaji majung saka ajia alima yimya dang, ajisüaka kodang kibong nung tebu kati mesüra tetsü kati tashi mangai pei kibong toktsür pei onüleni aotsü aser kidanga kecha meinyaki mejanga dang kazütsü ta süra, ajibo shitak masü, iba jagi kibong sensak tiai iadoktsü. Kasaji, kaketreju nung tesayurtemiang mapang shitak mamshira aser lokti nung lenirtemiang peisasa mazüoktet seplepra, ajia shitak masü, iba jagi pei lima telongi yoktsü. Kasaji, tanü Nagaland state government office-tem nung tilartem masü saka tulur aser tokolak purtemiang mapa shitak meinyakba aser temelaba magii mapai marui tangaleni oa adokba indang yakanü state government kübok department shia nungi tokolak purtem senden ka nung Chief Secretary-i mepelai ashibaji, Nagaland asoshi tejashitsü osang ka asütsü. Iba tebilemtsü kodang bilemdangdir, Nagaland majungba ya asenoki ochimashi inyakba kisüng agi masü saka asenoki pei mapa nung temulung magütsüba ajanga majunger ta angateter. Atangji, kidang kibong nung tsürabur asütsüba ya tasak, kechiyong tanurtemji pei tsürabur mesük kumadoktsü. Kasaji, lokti nung lenir asütsüba ya tasak, kechiyong tanidakertemi temulung lemtetsüsa jakla yimya tajung agi manira shingaia manidaktsü. Iba amaji, ajaki office nung tokolak kümner saka mapa inyakdak tesem ka nung tokolak aser tongti lenir asütsübaji temela masü, kechiyong leniri pei kübok inyakerkem dang o agi masü, pei mapa agi yamai shitak inyakang ta inyaka sayutsüla. Aji oda, office ka nung tokolak süra pa mesüra laji anepdang shia tama office atongtsüla aser anogo piyong mapang inyaka mener, nikongdang office mapang temer külena office nungi pa mesüra laji tesü aotsüla. Iba amaji pei taküm mapa agi inyaka sayu nung dang, pei kübok inyakerkemi mulungsua aser temulung lemteta anidaktsü. Ajisüaka, office nung tokolakbo tokolak saka office-i maru nü teimba aser tarunüa menur arutsü aser nikongdang aru maru ka pa mesüra la kübok inyaker toktsür tama oadotsü ta süra, ita ishika süir külenbo office chowkidar-ia mapang shitak nung office-a melapoktsütsü aser anü iaka office shibangi marutsü. Iba amaji oa oa office nung inyakerkema ka khen, ka khen ta maru akümtsü. Tanü Nagaland nung office-tem tensa tiaji yangji lir. Ano, tesasatsü kaji, department shia nung tokolak purtemi tang aser tarutsü Nagaland sentong yanglutsüba ser nung meyangluteter. Aji oda, Nagaland Vision 2030 yanglua lir, anungji küm pungo sülen Nagaland state ya maparen ajak nung teperi aser tajungba kümer alitsüba nung rangloker, department shia 2030 tashi nungbo 'iba tashikabo inyakteter alitsü' ta asüba tangtetba aser temulungtetba nung terenlok sentong yanglua lir. Ajisüaka, iba mangdang aser sentongji department aika nung mapa küma inyaka aotsü sentong mali, amadokba den kasa jenjang nung lir ta chief secretary-isa ashibaji ajak atema taoksatsü saka ano küm kümshir mapa tenzüksü mapang tajunga ta angtetdi. Tanübo joko center government-i anir India lima ya yimten nüchiso akaba lima ka kümer joko 2047 kumbo noklangjungmung amongtsü alinungji, iba küm tashi nungbo India ajunga kasasa maparen aika nung renloker alitsüsa inyaksü atema "Viksit Bharat" mangdang yur sentong atonga terenlok mapatem inyak tenzükogo. Aji oda, asenoka asen mangdang aser sentong nung aliba ama 2030 tashi nungbo Nagaland-a linük nung tanga state-tem den kasasa renloka orr alitsüsa office nung tokolak purtemi anir tilatiba tashi agi, pei mapa nung nendaka inyaksüla . Ibaji ser külenang ano center government-i anir 2047 tashi nungbo India ya maparen ajak nung alima kintem aika dang nungi tajungba renloka aotsü merangba sentongtem nung asenokia akok tashi mapang meindoki shilem agitsü tim. Ibaji asenok ajaki pei pei mapa nung nendaka aser ochishia inyakba ajanga ataloktsü. Joko, asenoka kibur nem mapang shitak nung mapai arung tabo joko ojang arütsüdaktsüdi !

OLEMSABANG

Akümlir Mongjen

Talitemjen Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

La aruba ji parnok ajaki oji nungi repranga atar ama lai ajitet. Lai Tiapetzük dang, "Kechiba alima nung aliba mapang takartem tesa, la tabenlen nung alirtem ji yamaji timtema jepteper" ta asüngdang. Iba mapang Tiapetzük-i, "Alima nung alidang, shirnoki pei ajung agi takar aküm ama, tilar aser meshimejunger nem temeim mesayu-i ngasangatema alir, itemji iba lima nungbo tilatiba kümer timtem tekangshi nung alir" ta langzü. Ano akümlir nung meshimejung aser sensakpu Melusang ajaki mezüngmeshiba lajar taküm ka, tipu lima nungbo tematiba jenjang nung ajaki akhümtsübuba ji ngua, la süngmangba ji Tiapetzük-i meteta ashi. "Akümlir lima alitsüba mapangji tatsü ka dang lir." "Manger mesangwa nung süitemadoker aser taküm alir ajak asütsüba." "Takar aser sensaker ta masü, shibai ajemalua temeim benshia liteter, pa/lai teti alitsüba lima jenjang tajung ya ajangzüker." Tongsangna-i longki telonglen nükschia reprangnüba ji, la taküm alidang jangrapangraba dang nungi tali tejangraba liasü. Longki telong jagi lai kanga idangnüa bilemer, parnok den külem-i longki jagi aitsü asüngdang. Iba mapang Tiapetzük-i la dang, "Na yagi aitta onok den alitsü ano mapang matong, Akümlir Mongjen-i meyipa oang" ta ashi.

Lai tanaben akümlir Mongjen-i meyipa mounüi nokdakba ji Tiapetzük-i meteta, "Na anasa aliba süngo tu ji Chiang aser na akümlir ka küma meyipa oang." "Ne tsürabur aser yimti nung alir ajaki na yungya atadagi" ta ashi. Iba sülen Tongsangna-i tashi angaa süngo tuji agizüka achi aser Tiapetzük-i ashiba ama tarulen-i meyip. La aküm lima-i meyipa aodang, lenmang nung kanga tsüra ait. Lai ajanger aruba merusepba ayungnu tanaben ajurua, tzü ajemtsü tekapu jagi tzü ji metemtetdang nung, tekapu nungji tapok mali tzü ji metemer arutet. Iba mapang, la tasü masü taküm lir ta meteta aru. Tongsangna-i ayungnu ji ajangli dang kinüngertem-i ajaba angashi aser temalen ama minperonga aitba lai meteta aküm. Iba sülen asangsang küma la nüjilen-i aru. Tongsangna süchia aoba nungi saakdang, lar kilong aser kima nung yimer yimsanger ajak adenshir, la meküta tetsü o tebu nati anir kinüngertem mangyima jeptepe liasü. La saakdang temang nung tashi mait kümer kanga luladok. Lai khenbo akümlir mongjen-i taküm meyipa aruba atema sasa bilem. Kechiaser tipu lima aliba longki ji, jangratemtsü aser telinütsü ka dang lai angu. Tongsangna-i, la süchia aoba mapangtem nung kechisa angu, yimertem dang otsü tatongi ka khen ka khen ta ashi.

Yimertem-i la ajanga akümlir mongjen ya süir külen, teti asoshi tanelatem aliba lima ka lir ta meteta aküm. Akümlir wadang tempanger asürtem tanela o bendangsang ji, lai anguba otsü nungi yimertem-i LONGKITSÜNGBA TSÜNGREM ta aja. La melu lima tasüaküm ayungküm nung nokdaker, anguba lima kibuba dangji MELUTSÜNGBA TSÜNGREM taa aja. Ibaji dang masü akümlir nung alidang, ajak den jungtepa kati ka taoba meimtepa alitsü la nungi angazük.

Anogo ishika süir külen, asü lima Tiapetzük-i la dang sayuba süngo tu ji bushi aser lai min ka nung angu. Süngo tu ji bener adoka shiranger nem chidaktsü aser shirangtem ji anep. Ibaji dang masü süngo tu jagi, shiranga alir ara sendokdaktsü. Shiranger ara sendokdaktsür asünung, la dang yimer-i ARASENER ta aja. Yimti nung dang masü alima ajonga nung shirangertem arasendokdakja lai senzü. La otsü ajanga alima ajongai, asü lima o bendanger ka lir ta kanga jangjaa meteta aküm. Asü lima Tiapetzük-i la dang na meyipa akümlir mongjen-i OANG ta shir taküm meyipa arula, alima ajongai la tenüng Tongsangna dang nungi OANGLA ta nungtugoba küma tetshi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



February 17, 2026 anepdang 10:00 ako meta New York kübok Boonville nung aliba Abundant Life Arogo Tenla ki arondang tangokba noksa nung angur. Iba tatalokba nung Pastor Brandon Pitts den Boonville Fire Department nungi nisung pezü yiru. New York Police-i iba tatalokba kuli bushisüngdang tenzükogo.

Khristantem tasü mang rongdokdaksüba Supreme Court-i nokdang

February 19, 2026: Supreme Court-i Chhattisgarh state nung tribal Khristantem tasü mang rongdokdaksüba nokdangogo.

State tesem balala nung tribal yimsü amangertem aser Hindu yimsü alia amangertemi Khristantem tasü mang aremba nokdang, aser Khristan yimsü tokjang ta rongshir.

February 18 nü Supreme Court-i, tang nungibo Khristantem tasü mang merongdoktsüla, ta metetdaksü. Court-i maneni iba ken o ya hopta pezü sülen angadangtsü.

Judge aseme akümba bench-isa state sorkar dang tezüluba nung telangzüba agüjang, ta tuyu.

Chhattisgarh Association for Justice & Equality teloki SC dang, tribal Khristantem tasü mang aremtsü memelaba ya linük temzüng kübok temeden anema lir, anungji court nem tiyongtsüi aita inyakdaksüner, ta metetdakja temepishiba ken o benoka liasü.

SC tetuyuba ya tribal Khristantem pelaa agizükogo.

Raigrah nung Bishop, Paul Toppo-i, "Supreme Court

tetuyubaji onoki pelaa agizük. Khristantem tasü mang leper nungi tutetba sülen tanga tesem nung remdaksüba tatalokba aika lir. Iba ya yimjung meimba Khristantem atema tajangshiba tamajung ka lir," ta ashi.

Osangbener den jembidang Paul-i, "Kecha kuli makai state nung Khristantem anema inyaker aser reshikangshir. Iba ya yimsü alia amangertemi ajungmesoba agi lir," ta ashi.

Paisa, akhidang nungi tribal Hindu aser tribal Khristantem tsüngda tesendaktep kanga junga liasü, ajisüaka yimsü alia amanger telok kari rongshiba ajanga Khristantem anema inyak tenzükogo, ta metetdaksü.

February 19, 2026 nü United Christian Forum (UCF) Tir, Michael Williams-i sangdong ka ajanga, "Onoki court tetuyubaji pelaa agizük. Ajioda state sorkaria iba tetuyuba ya shidak benschitsüla," ta metetdaksü.

Chhattisgarh nung dang masü saka Odisha aser Jharkhand state tem nunga yimsüngtem nung Hindu yimsü alia amangertemi yimdak Khristantem tasü mang meremdaksür mesüra

tasü mang aremba nokdangba agi Khristantemi timtem kanga ajangshir.

2025 küm kija nunga India tesem balala nung Khristantem nem tasü mang meremdaksüba tatalokba 23 liasü, ta UCF-i metetdaksü.

Michael Williams-i, "Item tatalokba ajanga- asalentong yanglur tribal Khristantem amokmerenba, tashiyim amshiba aser reshikangshiba kuli sayur. Tasü mang aremtsü atema Khristantem dak temeden lir, ajisüaka iba temeden anema inyaker," ta metetdaksü.

Osangbenertem den jembidang Chhattisgarh Christian Forum Tir, Arun Pannalal-i, "Khristantem anema inyakba tatalokba aika aliba state ka nung tang Court tetuyuba ya Khristantem atema anisüngzük tulu," ta metetdaksü.

All India Catholic Union nung otongdar, John Dayal-i, Khristantem anema inyakba nung ketdangsertem aser police shilem-a lir, kechiyong parnoki aibelenertem nokdangtsü atema meinyaker, aser ibaji ajanga aibelenertem temelung ulushidaksür," ta ashi.

ANOGO ABEN TSÜNGREM DEN

Laishiba

T. ken 119: 1 - 8

Ne ket nung Laishiba makara ne Khristan taküm koma alitsü ta nai bilemer? Laishiba ne taküm asoshi kechi inyaktsü ta bilemer?

Iba ken nung telangzüba kar Tsüngremi asenok nem agütsüba angur. Tekong shia nung ama iba ken nung Tsüngrem O amshiba angur. Tekong 1 - 8 tashi nungji Laishiba koda amshitsü iba indang sayur.

" Shirnok lenmang nung tamayazür lir, shirnoki Kibuba ozüng nung jajar parnok temoatsüba" (t. 1). Tamayazür tetezü, shirnok dak tashishitsü maket parnok dang ajar. Shirnok dak anemsü mali, tema nung tajung ama sayur saka telung nung teraksa shisatsü aliba yimya mali parnokji tamayazürtem lir. Parnokji tsüngchirtem lir. Asenok taküm Tsüngrem o nung yangera, asenok dak tsüngchiba alitsü.

Ken züluri ashir, " Shirnoki pa ozüngtem benschir, shirnoki temulung ajak agi pa bushir, parnok temoatsüba" (t. 2). Ne mulung ajunga Tsüngrem o nung lir asü? Laishiba mulungjangji telunglen shisatsü lir. " Kodang ne temeshi obendangba ni angazükdir, ni ne nem tamayazüba temulungjang agi tenüngsang agütsütsü" (t. 7). Iba nung ne temulungtetbaa dena lir." Ni ne ozüng benschitsü" (t. 8). Kodang nai ne mulungjang ajunga, ne tekolok aser temulungtetba ajunga Tsüngrem O nem agütsüdir, ne taküm külemi aientsü tenzük. Tanü ne taküm mesüra ner kibong raksaa lir asü? Tsüngrem O dangi meyipang.

Laishiba zülurji ka lir - Tsüngrem. Iba nung omen ka lir - Yisu Khrista. Iba nung osang ka lir - Tekümtet. Aser yagi temoatsü ka bener arutsür - Tsüngchi taküm.

Tsüngrem O ji tanelaren tashi angdak lir. Ochi jagi tanela mesür. Kodang nai tamang nung jajadir, ne tanela mesütsü asoshi Tanela Temeshii Laishibaji amshir. Tsüngrem O jagi ne taküm tsüngchi taküm yanglujang.

Tawa Yemen linük nung Khristantem apuba kanga bulua kümogo

February 19, 2026: Tesüiba ita ishika tsüngda Yemen linük nung Khristantem apuba kanga bulua kümogo, ta osang ka ajanga metetdaksü.

Tawa-a Yisu Khrista sülen anidaker Yemen nung 20 puogo.

Khristantem jagi sorkar anema inyaker ta tai tonglokja lenmang nung mesüra kidang lia apu. Yemen nung Khristantem aika Houthi-i ketdangzüba jail tem nung puoka lir aser Khristantem karbo samaogo.

Khristan asüba ajanga aika reshikangshir mesüra tepseter.

Yemen nungbo Khristan kati yimjak nung pei yimsü benschitsü makok, Kangki amshitsü makok mesüra yimjak nung tangar den Khristan yimsü lemsateptsü makok, ibayongji iba linük nung Khristantemi miimshia dang külemer.

Yemen nung Khristan nütsüng ishika dang lir, aser Khristantemi teimbaka Islam yimsü toktsür Khristan yimsü agizükertem lir.

Iba linük nung Islam yimsü toktsür Khristan akümertemi reshikangshi ajurutsü, ta metetsümonga Khrista sülen anidaksü telemtetba agir.

Meimchir temeden atema inyakba teloktemia Houthi telok aliba tesemtem nung Khristantem apuba osangtem metetdaksüogo.

Human Rights Watch & Ministries-i, tawa Yemen nung Khristantem aika puogo aser jail nung aliba Khristantem aika samaogo; parnokji tepsetadoker asütsüa akok, ta metetdaksü.

Yemen linük nung nütsüng shilem 99 liasü saka tangbo nütsüng shilem 100 Muslim nungertem dang lir, ta sorkaribo

jembir.

2015 küm nungi tenzüka Yemen nung sepaitem aser Houthis tsüngda rarar, aser Saudi Arabia densema linük kari sorkar pusemer.

United Nations-i ashiba agi, 2014 küm nungi 2021 küm tashi nung alima nung nüburtemi timtem tuluba ajangshiba linükji Yemen liasü. Tangbo Yemen nung tensa terabo tajungba akümogo.

Yemen nung rara ajanga nisung 370,000 asü aser million aika jenshia liasü.

2000s tetenzüklen Yemen nung Al-Qaida telok jenoka aliba mapang nung bendanger Khristan missionary tem anema inyakba tatalokba aika liasü.

2002 küm December ita nunga nisung kati America nung Baptist missionary asem- William Koehn, Kathleen

Gariety aser Martha Myers prok. nung khaseta liasü.

Missionary asem khasetsang jagi police dang, Islam yimsü asüngtettsü aser Tsüngrem anasa taliba aotsü atema pai missionary tem khaset, ta metetdakja liasü.

2021 küm nunga al-Qaida teloki America nung tesayur, Joel Shrum khaseta liasü. Arrshi küm 29 Joel jagi Yemen nung Khristan yimsü proker ta pa nem tai tonglokja pa khaset.

2016 küm March ita nunga Islamic State teloki Missionaries of Charity home ka amakba mapang nung nun pezü aser Khristan 12 khaseta liasü.

Item ama tatalokba kanga bulua akümba ajanga missionary aikati Yemen linük toktsür ao, ajisüaka anüngzükba missionary ishikati kanga tasü itta maneni Khrista osangtajung

2017 küm tashi nungbo Yemen nung aliba bendanger missionary tem ka danga manüng, ajisüaka parnoki metsüh proka yutsüba ajanga Yemen nung aliba yimitem, kanga tezülen aliba tenemlen aser lisem-limatem nung Khristan meyrjang aika lir.

Yemen nung Khristantemi pei linük nung dang masü saka bendanglena reshikangshi ajangshir. Yemen nung Khristan aika Egypt nung pua tanaben Yemen-i meypa yokogo, aser parnok rongnung Abdul-Baqi Saeed Abdo densema liasü.

Tang alima nung Khristantem alitsü atema linük tamajungtiba 50 rongnung Yemen ya jenjang 3buba nung lir (Open Doors' World 2026 Watch List).

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Tzüsapok

(adv) mei mapang tzü pokteta adokba (Spring water during monsoon)

* Tzüsapok adokdak tesem ya septzü len alir.

Tzüssem

(n) tzüyim nung mopong agi tzü nongshiba (waves)

* Tzüyim nung tzüssem agi ango aika tzüküm nung nongteta toksü.

OLONG PAITEP # 7420

15x15 crossword grid with numbers 1-15 indicating starting points for words.

TIPILEN

- 1. Chiyungtsü oksa - (5)
3. Tatalokbatem - (5)
5. Tama - (6)
6. Pei meyong aküm - (3)
7. _ _ _ _ bang - (4)
8. Kinungpurtem - (7)
9. Nokdak masü - (4)
12. _ _ _ la - (3)
13. Ochi masü - (6)
14. Yagi Sü ataker - (5)
15. Temadok - (5)

LANGTSÜNGLEN

- 1. An tetsü - (5)
2. Juzüa senzüba shiruru - (7)
3. Tamendakdak - (4)
4. Tiak-asang - (6)
7. Tasa - (7)
8. Süngjang telung nung aliba - (6)
10. Ibai masü - (5)
11. Ano mamen - (4)

OLONG PAITEP # 7419 TELANGZÜBA

TIPILEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. teronem, 12. Sempa, 13. Jahaz.

NAI-A YA METETTER MA



LANGKAWI APU

Malaysia lima 'Langkawi sky-bridge' ta ser apu ka kanga dang temenungratsüka yanglua lir aser iba apu ya tzü nungi metres 700 temaleni ajungketa tuagi yanglua lir. Iba apu ya tenem adena oagi metre 125 talang lir. Kanga dang jangratemtsü kaji, idak nung yagi Andaman tzüyim aser Thailand nung Tarutao ta ajaba asetkong tereprangnüsüka angur.

Assam nung süngolunung inyakertem taah ajungkettsütsü

Guwahati, Tsüklai/February 19 (Agencies): Assam nung Assembly elections magi tsüingda Chief Minister Himanta Biswa Sarma-i Brehostibarnü Budget Session mapang tongtibang tinyaktsü balala sangdongogo, kong terenlok maparen, investment sentongtem aser mapa agütsütsüba tenanzükbatem densema lir.

Assembly nung o jembiba mapang Sarma-i, March 1 nü nungi süngolunung inyakertem taah ajungkettsütsü ta sangdongogo. Anogoshi taah ajungkettsütsü atema mapang talangka khanga aruba sülen tang iba telemtetba agiogo.

Investment dak sendakba nung Chief Minister-i ashiba agi, industry tem amenoktsü

atema maongkatem asadangtsü atema Japan nunger company 20-i February 28 nü Jagiroad semdangtsü lir. Bendangertem nem sen entokdaktsütsü atema atsüa arutsü aser Assam nung manufacturing base akangshitsü asoshi state sorkar-i merandangba nung shilem ka ama item company tem yagi Assam semdangtsü.

Kasa mapang nung mapa agütsütsüba indang jembiba mapang Sarma-i, par sorkar tanaben shimra parnoki sorkar kümteter küm asem tsüingda mapa 55,000 agütsütsü aser talisa mapa ya Education Department yongtsü nung asütsü, ta ashi. Paisa, election magi tsüingda Education Department nung nisung 5000

shimokba sangdongtsü ta metetdaktsü.

Rongsenketzüing nung nükjidong indang jembiba mapang Chief Minister-i ashiba agi, Assam ya 2028 küm tashi nungbo sen 10 lakh crore economy ka kümdaktsütsü nükjidong lir. Paisa, taoba küm pongu tsüingda state rongsenketzüing shilem 45 renlokogo aser Assam ya linük nung takaratiba renloka aoba state ka kümogo, ta ashi.

Infrastructure dak sendakba nung Sarma-i, taruba anogo 10 tsüingda 150-megawatt Kapili Hydro Power Project ka lapoktsü, ta ashi. CM-i, Karbi Anglong nunga 25-megawatt hydro power project ka atema mapang tenzükogo, ta metetdaktsü.

Manipur nung AR-i bomb rema aliba defuse sütsü

Imphal, Tsüklai/February 19 (Agencies): Assam Rifles nungi Bomb disposal expert temi Manipur kübok Tengenoupal district nung telungpurtemi rema tokja aliba bomb puteta neutralised sütsüogo, ta ktdangsurtemi Brehostibarnü metetdaktsü.

Moreh Police Station kübok Border Pillar 72 anasa Yangoubung temeket nung lendong agi meneptsü ana nung aliba tesemtem meita aoba nung shilem ka ama iba operation ya benoka inyaka liasü. Osang tejangja angazükba sülen bomb disposal team ka nung züngsem

14 bomb nguteta aliba tesemi yoka liasü.

Iba team yagi Bodhbarnü Chinese hand grenade ana neutralize süja liasü. Ktdangsurtemi ashiba agi, bomb tem ya arrtsü nung aliba nüburtem atema lendong tulu liasü. Iba inyakyim ya shinga meyirui mesüra ki o jen kecha meraksai tembanga inyakogo.

Tanga tatalokba ka nung February 18 nü security force temi Imphal West district kübok tesem balala nungi prangbong aser injangtem ngutetogo.

Sekmai Police Station kübok Loitang Leikinhabi hill range

nungi sepaitemi AK-47 Ghatak rifle ka den magazine, .303 rifles ana, double-barrel rifle ka, single-barrel rifle ka, grenade 36 aser Improvised Explosive Devices (IEDs) pongu nguteta liasü.

Maneni Wangoi Police Station kübok Hiyangthang Tarahei Awang Leikai tenemtsüing meita aoba mapang sepaitemi hand grenade asem, high-explosive bomb ka, calibre balala indang injang 15, 5.56 mm empty cases pezü, tube launcher ka aser "Green 90 AKFG" ta ajenoker aliba mejangjaba bomb ana nguteta liasü.

Priyanka Gandhi anogo ana atema Guwahati tongogo

Guwahati, Tsüklai/February 19 (Agencies): Congress Screening Committee mendenbula aser Wayanad MP Priyanka Gandhi Vadra anogo ana atema Brehostibarnü Assam tongogo.

Lokpriya Gopinath Bordoloi International Airport tonga aruba sülen APCC tir Gaurav Gogoi-i ashiba agi, lai state semdangba ajanga grassroots party worker aser block-level lenirtem nem parnok tebilemba Centre nungi lenirtem den indang indanga lemsateptsü atema maongka agütsütsü ta ashi.

"Party lenirtem idaki aruba mapang party nung inyakertem kanga ajungmesor. Ajisüaka senden tulu nungbo parnok o jembitsü maongka mangur. Tanü block tir aser grassroot nung inyakertem parnok bilemba lemsateptsü maongka angutsü. Priyanka Gandhi-i khuret tulu ka agizükogo," ta pai ashi.

Guwahati atongba sülen Gandhi-i Kamakhya Temple semdanga sarasadem aser iba sülen GS Road nung Assam



Pradesh Congress Committee (APCC) headquarters-i ao, kong candidate asadangba senden tenzüka liasü. Gogoi-isa, Gandhi-i anogo ana atema state semdangba nükjidong ataloktsü imlaba lemsatsep.

Priyanka ya Opposition lenir Debabrata Saikia, Gogoi aser Assam in charge general secretary, Jitendra Singh nungri meiner oa liasü.

Assembly election atema Congress candidate shimba inyakyim nung Block Congress Committees, Zilla Congress

Committees, APCC ktdangpurtem, frontal organisation tem aser cells aser department balala nungi züngsemtemi shilem agitsü imlar. Source balalai ashiba agi, senden ya ghonda 12 tashi amentsü akok.

Gogoi-i ashiba agi, taoba mapang pai candidate asadangaba inyakyim ya achaayanga liasü, saka tang mezüngbuba Gandhi-i iba khuret abentsü aser iba ajanga Centre nung lenirtemi iba election süoki ia agiba sayur.

US mitkari hopta tatemlen Iran amaktsü renema lir: Report

Washington, Tsüklai/February 19 (Agencies): US mitkari tan hopta tatemlen Iran amaktsü renema lir, ajisiüaka Tir Donald Trump-iba mera agitsü temelaba agütsütsü asoshi ano telemtetba magiteti lir, ta osang kar ajanga ashir.

Hopta tatem tashinung mitkar temi amaktsü renema lir ta White House nem metetdaksüogo, ta osangtem ajanga ashir. Middle East nung anogo ishika tsüngta US mitkar anünglen aser tzüyim nung amshiba assets tem tali ulushia akumba mapang ka nung iba osang ya angazüker.

US-i tan hopta tatemlen Iran amaktsü renemtar ta osang lir aser ano osang kar ajanga Trump ya amaktsü asü mamaktsü ta telemtetba magiteti lir ta ashir. Pai advisers aser allies tem dang tajungtiba meraji kechi asütsü ta shisa agitepba mapang lir.

"Pa iba indang bilemdang mapang jenti indoker," ta osang ajanga ashir.

Bodhbarnü ang United States aser Israel nati Iran anema military operation tuluka kanga yakta tenzüksü akok ta osang ka liasü. Iba sentong ya taoba küm anogo 12 raraba dang nungi tuluba aser inyakra hopta aika raratsü akok, ta osang ajanga ashir.

Trump-i Iran indang nuclear mangdang nokdangtsü

tongtipang lir ta aiben shia arur. Tawa allies aser advisers tem den sensaksema mapanga yimjung ken o jembiba nung Tehran-atsüanem mekara mitkar tashi amshitsü indanga jembia aru.

Bodhbarnü White House press secretary Karoline Leavitt-iba ashiba agi, Iran-iba hopta ishika tsüngta ken o jembishinüba nung par tangatetba tali tejangjaba agütsütsü imlar, ta ashir saka iba mapang Trump-iba mitkar inyaksangshi soita ayutsü indangbo mashi.

"United States indang tir tenüng nung ni mapang lateta meyutsütsü. Tiri teti tangatetep kati arutsü meranger aser mitkar mera agitsüjia renema dang lir," ta Leavitt-iba ashir.

"Iran amaktsü atema kuli aser langzütepba aika lir. Trump-iba par national security team nungi counsel dak metaloka lir," ta lai ashir.

US Secretary of State Marco Rubio-iba Israel Ato Kilonser Benjamin Netanyahu ajurutsü atema February 28 nü Israel-iba aotsü imla lir, kong pai Iran indang jembishinüba osang agütsütsü, ta State Department ketdangtsü kati ashir.

Kasa mapang Iran amaktsü chances ya shilem 90 lir ta aikati bilemer. Ajisiüaka Congress medeni Trump-iba aji meinyaktettsü.

US representatives aikati pa bhukuma nokdaker aser Congress-iba asen Constitution nung aliba ama rara atema vote agitepsüla ta ashir.

Representative Thomas Massie-iba X nung, "Ro Khanna künati House nung iba vote akok tashi tekeraba nung agitepdaktsütsü merangtsü. Ni America mezüng südaktsütsü vote agütsütsü, tetetzü Middle East nung rara tali anema vote agütsütsü," ta zülua liasü.

Kasa mapang Trump-iba Bodhbarnü Britain dang tongtipang Diego Garcia military base magütsütsü tekumdangtsü ashir, aser Washington-iba Iran amaktsüsa kumra iba facility ya kanga tongtipang asütsü ta ashir.

Truth Social nung Trump-iba ashiba agi, pai UK Ato Kilonser Keir Starmer dang Chagos Islands sovereignty ya Mauritius nem magütsütsü ajungshia arur aser Giego Garcia air base mechi long-term lease arrangement ya aibelen tulu asütsü ta ashir.

Iba den Trump-iba Iran-iba tezüngzüktep ka meyaglura US-iba Diego Garcia aser UK nung par indang military bases amshitsü aser Iran-iba UK aser danga tembar linüktem amaktsü akok ta tekumdangtsü ashir.

"Kechi südir süaka Ato Kilonser Starmer-iba Diego Garcia ya mesamatsüla," ta pai ashir.

South Korea taoba tir takum tepiyong tepuokdak ayutsü

Seoul, Tsüklai/February 19 (Agencies): Mitkar yimsüsüba benoktsü meranga sorkar anema apusotsü tasa yangluba mechi South Korea indang taoba tir Yoon Suk Yeol takum tepiyong tepuokdak ayutsü obendang agütsüogo.

Yoon-iba constitution atsüngdoktsü meranga December 3, 2024 nü mitkartem National Assembly shibangtsü yok aser yimten yimsüsürtem aputsü totuyuba agütsü, ta Seoul nung aliba court kati ashir. Pa inyakyim ajanga South Korea indang democracy raksatsü aser temerenshi tulu langa lir, ta presiding judge Ji Gwi-yeon-iba court nung ashir.

Prosecutors temi tasüba temerenshi agütsütsü lenmang bushia liasü.

Mapang tatsüka atema süaka Yoon indang martial law totuyuba ajanga linük tali telemsa adokdaksü aser iba telemsa ya obendang agütsüba mapang kanga jangja ajitet.

Yoon bhukumer telok tuluka court kima ken o jembimetenzükdang adenshia banners nung "Yoon, again" ta zülur bener liasü. Obendang agütsüba sülen parnok aika ajep.

Kasa tesem nung Yoon anema longkak aiter temi pa

nem tasüba temerenshi agüjang ta ayimtena liasü.

Yoon-iba pa tia indang angashidang pa tejak nung jashia bilemba majitet. Pa okatsür temi iba obendang ya kuli agi yariba masü ta ashir aser "pre-written script" sülen anidakba lir ta aitsü.

Anatsülen nungi iba obendang melenshitsü ken o benokra, iba ken o ya Supreme Court tashi atutsü, tetetzü obendang agütsütsü ita aika agitsü.

Yoon-iba December 3, 2024 nü live television nung martial law sangdonga par linük anokshitsü.

North Korea den dena aliba "anti-state" forces nungi linük kumzüka ayutsü mechi iba mera ya agir ta pai ashir, saka linük nung mepetmesü aliba mechi lir ta jangja akum. Parliament nung opposition timba liasü, anungji pa tamakoker tir ka ama akum, aser pa kinungtsü Kim Keon Hee ya ochimashi mapa inyak ta tai tongloksüba aika liasü.

Pai sangdonga aliba melenshitsütsü atema ozüng yanglurtem National Assembly telungi raratepa aoba sülen ghonda ishika tsüngta iba totuyuba ya agiena liasü.

Iba sülen ita shika yimtenren tsütsü rongrong tulu adoka,

Yoon ya menden nungi atsüngdok aser pa aser danga ketdangtsürtem anema ken o balala benoka liasü.

Sorkar anema nokdakba nung shilem agiba mechi taoba ato kilonser Han Duck-soo ya küm 23 tepuokdak ayutsü obendang agütsü, martial law benoktsü Yoon nem shisa agütsüsang ex-defence minister Kim Yong-hyun ya küm 30 tepuokdak ayutsü Brehostibarnü obendang agüja liasü.

Taoba interior minister Lee Sang-min, taoba intelligence commander roh Sang-won aser taoba police tekolak Cho Ji-ho nungera tepuokdak ayutsü obendang agütsü.

Yoon atsüngdoker tir election agiba nung takok ngua tang yimsü tesüdak Democratic Party-iba Yoon nem tasüba temerenshi magütsüba asoshi court dang jashiba lemsatepa liasü.

South Korea nung December 1997 nungi shinga nema tasüba temerenshi agüja mali.

Yoon ya tim masüba nung tashi amshiba aser martial law sangdonger pa aputsü nokdangba atema tepuokdak yua lir.

MULUNGNEN O



ASO: 23-8-1930 ASÜ: 13-2-2026

Tamangdir obala, na mali onok azüngmeyaka rongjenseter. Ne senti sayubentsü o tajungtem onoki kodanga mamatsü. Tanü na onok den meliaka na Yisu den tepeladak Kotak nung alitsü ta amanga onok mulung süngzüker. Kenü Yisu den asenok ajak ajuruteptsü yongya atar. Onoki kodanga amatsü makokba asür obala I. Lanutsülak (Waromung), Tsüngremi agütsüba tangu tembanga Yisu dangi aoba anogo nungi tenzüker ozü mangyim nüktzü agi sünger temulung zürepa aliba mapang ajak nung temeimertem kija kibong, Arogotem aser lokdi tentet balala shirnokisa nübu, rongsen, shisatsü aser sarasadem ajanga nungita ozü mulung süneptsüogo, nenok ajak dang kangasa pelaba lemsateper. Nenok ajak dangi tsüngtong arua ozü mulungnen o melemsatepteter, saka Tsüngremi nenok taküm kibong aser lokdi balala ajak maneni moajangma ta ozü tamang sarasadem. Temeim Chirnurtem, Semchirtem, Amolatem, Anükapang aser kinungertem.

OFFICE OF THE CHANGTONGYA SENSO UNION TZÜDIKONG TOWN

TENÜNGSANG AGÜTSÜR

Mr. Tiatoshi. Lkr aser Mrs. Moalila. Jr tena jabaso Dr. Shiluakum, College of Veterinary Science, Khanapara, Guwahati nungi BVSc & AH (Bachelor of Veterinary Science & Animal Husbandry) 1st Division nung takok tulu anguba asoshi sensosanger ajaki konang tetushi agütsür. Tsüngremi Pa taküm maneni len ani-a moajangma.

Sd/- K. Bendang. Jr (President) Sd/- Talisunep. Jr (Secretary)

ALI TAYOKTSU LIR Chümoukedima 'A' Village 10,000 s.ft @ Rs. 260/ s.ft. No Broker Contact : 9615445779

Karachi nung ki ka chirep, nisung 16 asü & 14 yiru

Karachi, Tsüklai/February 19 (Agencies): Brehostibarnü Pakistan linük kübok Karachi nung gas apokba ajanga nisung aliba ki ka chirepa tetsür aser tanur densema nisung 16 asü aser 14 yiru, ta ketdangtsür temi ashir.

Assistant Superintendent of Police (ASP) Jamshed Asher-iba ashiba agi iba lendong ya anepdang 4:15 ako nung Sehri mapang atalok aser gas ya iba ki mezüngbuba floor nung apok.

Urban search and rescue team aser disaster response gari ka teyari nung search and rescue operations ya tang teinyakdak lir, ta Sindh Rescue 1122 ajanga ashir.

"Iba ya ozüng agi mela yangluba ki ka masü aser takdang balala agi iba structure ya yanglu," ta Rescue 1122 Chief Operating Officer Dr Abid Jalaluddin Shaikh-iba ashir aser ki chirepba mapang temeket nung aliba ki o jen raksa.

Rescue 1122 ajanga osang agütsüba nung asürtem ronung tanur ti, tetsür pezü aser tebur pezü aser parnok ya arishi küm ana nungi 60 tsüngta lir. Yirur alirtem rongnung tanur tenet dena lir.

Iba lendong atalokba sülen Sindh Chief Minister Murad Ali Shah-iba nüngdakba

ketdangtsürtem dang ki agi anenbanga aliba nüburtem kumzüksü aser yirur alirtem akok tashi tajungba nung anepalutsü ashir.

Pai iba timtem agi kongshir aliba kibongtem yaritsü ozüng agütsü aser Karachi commissioner dang iba lendong atalokba tera bushisüngdangtsü tuyuogo.

"Lendong agi kongshir aliba kibongtem nem teyari agütsütsü, khen asoshi anisüngzükdak aser nungdakba agütsütsü asoshi Rehabilitation Department nungi ketdangtsürtem iba tesem nung arua lir," ta Adviser to CM for Rehabilitation Giyan Chand Essrani-iba sangdong ka nung ashir.

Karachi nung nisung million 20 dak tema alir, kong ki o jen junga meyangu, ozüng alema ki o jen ulushia aoba, ki o jen tejen, nisung tali aser building regulations shidak mamshiba otsü lir.

2025 küm July ita Lyari area nung storey pongu building ka chirepba sülen nisung 27 asü aser ter yirua liasü.

Kasa küm August ita Orangi Town nung Awami National Party (ANP) indang office nung gas poka office chirepba mapang ANP nung inyaker nisung pezü yirua liasü.

PDSA-i district nungi asayar ana nem tenüngsang agütsü



Mudotsu Dozo

Yoto Chizo

Kohima, Tsüklai/February 19 (TYO): Phek District Sports Association (PDSA)-i Brehostibarnü sangdong ka ajanga Association züngsem aser asayartemi tawa district nem konang tetushi bener arutsüba atema kanga pelaba lemsatepogo.

PDSA tir Nezosa Tetseo-i sangdong ka ajanga ashiba agi, Thüvopisü yimtsüng nungi Dozo'er jabaso Mudotsu Dozo-i Colombo, Sri Lanka nung February 6 nungi 11 tashi asayaba 6buba South Asian Sepaktakraw Championship nung India tebur sepaktakraw team team nungi asaya-a team event aser regu event nung gold

medal ana nguogo.

Pa tang 20buba Asian Games atema national camp nung shilem agidar. Pa linük tenüng nungi international jenjang nung temaba sabang nung shilem agitsü renemba mapang maneni asaya dak rangloker asayatsü aser takok nguyonga aotsü imlaja ataba PDSA-i lemsatepogo.

Kasa mapang nung Khutsokhuno yimtsüng nungi Razuchi Chizo'er jabaso Yoto Chizo-i, shiba Nagaland nungi Muaythai asayar ka lir, pai bendanger atema Muaythai Instructor Course takok ngua agiogo. Pai Sports Authority of Thailand, Ministry of Tourism &

Sports kübok Board of Boxing Sports office nungi 2026 küm Febuary 9 nü pa indang certificate agizüka liasü.

Association-i, pai iba takok anguba ya nemadangtsü mapang ka koba ajanga pa indang career jenjang tajungba kümdaktsüba dang masü saka district aser state nung Muaythai asaya tamendakdak akangshitsür ta ashi.

PDSA-i ashiba agi, asayar anaprongla yagi discipline nung takok angutsü atema bendanga agüja inyakogo. Parnok takok yagi Phek district ajunga nung lanur asayartem ajungmesotsü aser iba ajanga aremzüka meranga inyakra district nungi asayartemia national aser international jenjang tongtetsü ta kuli agütsür, ta kasa sangdong ajangsa metetdaksü.

Maneni PDSA-i tenaprongla dang temaba jenjang atongtsü atema meranga inyaktsü aser taruba putu atema nükrangdong ka akümtsü ajungshiogo. PDSA-isa, district nungi asayartem anitettsü atema parnok maneni bendanga agütsür aliba nenshia metetdaksüba den Mudotsu Dozo aser Yoto Chizo naprongla tarutsü nunga takok nguyonga aotsü imlaja ataba lemsatep.

Harmanpreet Kaur-i otsü tasen yangluogo



Tsüklai/February 19, 2026 (Agencies): India captain Harmanpreet Kaur-i Brehostibarnü otsü tasen ka yanglua la ya tetsür international cricket asaya nung timbaben asayaba sayar kümogo. Australia den Manuka Oval nung tanabuba T20i asayaba mapang lai iba alizüing tongteta liasü.

Iba asaya densema Kaur India tenüng nungi international asaya 356 nung asayaogo aser lai New Zealand tsür Suzie Bates-i (355) ajatetogo. Kaur sülen Bates, Australia tsür Ellyse Perry (349), taoba India captain Mithali Raj (333) aser England tsür Charlotte Edwards (309) nunger lir.

Kaur shiba 2009 küm mezüingbuba international asaya nung asaya-a liasü, la format asemprongla nung asaya arudar. Lai tang tashi nung Test trok, ODI 161 aser T20i 189 nung asayar lir. La T20i asaya 189buba nung asayaba mapang iba alizüing tongtetogo.

Kaur ya India team nung

asayar tongtibang ka lir aser la lenisüba nung India team-i 2025 küm mezüingbuba ODI World Cup akok aser England dena T20i asayamunga ka kokogo. Iba ita tetenzüklen la nem Padma Shri award agütsüogo.

India aser Australia na T20i tasayadak lir aser iba sülen ODI asem aser Test asaya ka asayatsü lir.

Mezüingbuba T20 asaya ya India-i DLS method benokba sülen run 21 agi koka asaya asem asayatsü aliba series nung parnok 2-1 agi tejakdang lir.

Iba asaya nung Reddy-i ball kanga junga ona run 22 agütsür wicket 4 agi aser Australia puri over 18 nung run 133 dang yangluteta liasü.

Run arishiba mapang Shafali Verma aser Smriti Mandhana nati asaya kanga junga tenzüka over 5.1 nung run 50 yanglu. Ajisüaka tzünglu kanga sashia aruba ajanga asaya tembanga masayatet aser DLS method benokba sülen India-i takok angu.

PHF tekolakba mapang nungi anen; Imad Butt nem tenokdangba agütsü



Shakeel Ammad Butt

Tsüklai/February 19, 2026 (Agencies): Pakistan national hockey team iba ita tetenzüklen Australia nung oa asayaba mapang hotel dak sendakba nung mepetmesü adokba sülen Pakistan Hockey Federation (PHF) tir Tariq Bugti-i mapa toktsüogo.

Bugti-i Brehostibarnü sangdong ka ajanga pai PHF patron-in-chief PM Shahbaz Sharif nem pa indang resignation agütsüogo ta ashi.

"Ni kü indang resignation shiti PM dangi yokogo, saka ni pa aser Field Marshal Asim Munir

dang Australia nung FIH Pro League mapang tatalokba ya kanga junga bushisüngdangtsü mepeshir," ta Bugti-i ashi.

Social media nung Pakistan nunger asayartem Sydney yimtung nung parnok khu bener nokdaktepa aliba video ka prokshiba sülen iba mepetmesü ya tenzü.

Video prokshiba sülen Pakistan hockey captain Shakeel Ammad Butt-i kecha timtem mali ta shia video tanga ka lemsatep.

Ajisüaka ki tonger anogo ishika lir Lahore nung

osangbenertem den sensaksemba mapang Butt-i PHF aija liasü. Pai iba asayamung mapang senotsü shitak achaayang masüba atema federation aitsü aser tanga video ka nung par team tanendak makai akümba sülen yimtung nung senzüba aser asaya ka masaya tsüingda auso dena shitoka liasü, ta ashi.

Paisa, asayar teku nem PSB aser PHF nati taoba küm atema tang tashi daily allowances magütsüi lir ta ashi.

FIH Pro League phase asemprongla atema sorkari senotsü agütsür liaka kechiba parnok kangshir ta asayartemi asüingdanga liasü.

PHF aitsüba atema Bugti-i Butt nem küm ana atema tenokdangba agütsü aser Pakistan hockey tenüng menüksüba atema pa aija laisü.

Iba mepetmesü atema PHF aser Pakistan Sports Board (PSB) na kati ka dak tai tongloktsütepba aliba mapang Bugti-i tang mapa toktsür.

Bugti-i ashiba agi, Australia tour ya PSB-i achaayanga liasü, ajisüaka PSB-i hotel nung anenba menoktsü atema sen million ka dak tema cheque agütsüba indang asüingdangba mapangbo pai telangzüba magütsü.

T20 World Cup: West Indies-i run 42 agi Italy kokogo

Tsüklai/February 19, 2026 (Agencies): T20 World Cup asaya nung West Indies puri Group C nung Italy run 42 agi koka group stage tembangogo. Shai Hope-i half-century tanabuba atonga yanglua team nem teyari agütsüba den bowler temia asaya kanga junga azioka ball ona asaya kokogo.

Iba asaya akokba sülen par telok nung parnok temaba jenjang nung tembangogo aser Super Eights-i iogo.

Italy-i mezüing fielding amentsü simba sülen batting amenba mapang West Indies puri asayar 6 out ser run 165 yanglua liasü. Hope-i ball 46 nung run 75 yanglua team takok dangi ani. Pai four trok aser six pezü züka liasü.

Asaya nung Brandon King (4) aser Shimron Hetmyer (1) na kanga kara out süatok. Roston Chase-ia meyilongi asaya-a ball 25 nung run 24

yanglu aser Rovman Powell-ia run teku dang yanglua liasü.

Italy nunger spinner Ben Manenti (2/37) aser Crishan Kalugamage (2/25) nati asaya tom aser tatemlen azioka liasü.

Run 166 arishiba mapang Italy team-i over 18 nung asayar ajak out sür run 123 dang yangluteta asaya makok. Matthew Forde-i (3/19) powerplay nung ball kanga junga ona Justin Mosca aser Syed Naqvi na out süja liasü.

WI nunger bowler tem rongnungi Shamar Joseph-i ball tajungba ona pai run 30 agütsür wicket 4 agi. Left-arm spinner Gudakesh Motie-i (2/24) asaya teyongtsülen ball kanga junga ona JJ Smuts aser Ben na out süja liasü.

Italy team-i iba asayamung nung asaya ka dang akok aser kasa mapang nung West Indies-i asaya ka nung danga tamakok mongui Super Eights tongtetogo.

BILEMDANGANG

"Tamasa nüsasa na bushitetang."